

Registered at the G.P.O. as a Newspaper.

TE TOA TAKITINI

Te Utu mo te Pepa 10/- i te tau,
Me penei nga reta "Te Toa Takitini." Box 300, Hastings.

868

TE TOA TAKITINI.

Noema 1, 1928.

TE KARAKIA WHAKATAPU MO TE PIHOPA.

He whakaatu ano tenei kei te 2 o nga ra o Tihema nei te karakia whakawahi i to tatou Pihopa, ki te Whare-karakia nui i Nepia (Cathedral) ka timata te karakia i te 11 o nga haora i te ata. Ka tae katoa mai nga Pihopa o Nui Tireni ki taua karakia. Ko te kauwhau kei a Hapata Wiremu, a ka reo rua tana kauwhau, pakeha Maori.

E 550 nga nohanga i roto i te whare-karakia kua rite mo nga Maori, a pera ano hoki te rahi o nga nohanga kua rahuitia mo nga pakeha, ara ko te hawhe tonu o te whare ki nga Maori, ko tetahi hawhe ki nga pakeha.

Kua whakaritea ma te tikiti rawa ka uru ai te tangata ki te Whare-karakia. Kaore he utu mo te tikiti, engari i peratia ai kei pokea nga nohanga e te tangata, pakeha, Maori, a ka mahue te iwi i haere mai i nga whenua tawhiti i te kore waahi watea mo ratou. Kua tae mai nga whakaatu kei te haere katoa mai nga minita o te Pihopatanga o Waikato, me nga minita o te Pihopatanga o Poneke. Ko etahi o to Akarana Pihopatanga e kore e puta mai. (Kua whakaaturia te taumaha o te tikiti hei utunga ma te minita mai i raro atu o Akarana ki Nepia ara kei te £7 ki te £8).

Haunga hoki nga minita o tenei Pihopatanga o Waiapu, kei te haere katoa mai ratou.

Kei te haere mai hoki a Ta Apirana Ngata me te ope rangatira o roto o Ngati Porou, ahu mai nei ki o tatou rangatira o roto o Turanga, tae mai ki Te Wairoa.

Kua tae mai hoki te whakaatu tera e tae ki te 50, neke atu ranei, te ope o TeArawa.

Te Marae: Kua rite a Te Pakipaki hei marae nohanga mo nga manuhiri. Ko Hori Tupaea te tiamana o te komiti hei tiaki i te marae. Kia mahara ano ra e nga manuhiri ki te mau mai i o koutou karukaru, kaore hoki he puia o tenei wahi hei whakamahana i a koutou.

Nga tereina. Kua whakaae te kawanatanga kia tu te eke-perehi (express) tereina i Te Pakipaki a te Hatarei te 1 o nga ra o Tihema, kia tuku iho ai nga manuhiri i reira.